

琼琚佩语

魏裔介

文硕阁

wenshuoge.com

目录

关于我们	3
为学	5
修己	7
惇伦	10
政术	11
敬畏	13
勤俭	15
摄生	16
接物	18
出处	20
人品	21

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

为学

一时劝人以口，百世劝人以书。〔韩退之〕

圣希天，贤希圣，士希贤。〔周濂溪〕

涵养须用敬，进学则在致知。〔程明道〕

六经须循环理会，义理无穷。〔程伊川〕

吾道自足，何事旁求。〔张横渠〕

学者于释氏之说，直须如淫声美色以远之。不尔，则駸駸然入于其中矣。〔程明道〕

心不清则无以见道，志不确则无以立功。〔林和靖〕

读书，吾得其要天命之性是也。〔薛文清〕

读书不向自家身心做工夫，虽读尽天下书，无益也。〔薛文清〕

开卷即有与圣贤不相似处，可不勉乎。〔薛文清〕

为学只是学天理人伦，外此便非学。〔薛文清〕

造化无一息之间，人之存心亦当无一息之间。〔薛文清〕

论性是学问大本大原。〔薛文清〕

才收敛身心便是居欲，纔寻思义理便是穷理。二者交资，而不可缺一也。〔薛文清〕

自有文籍以来，汗牛充栋之书日益多，要当择其是而去其非可也。〔薛文清〕

得圣学之真，则知异学之妄。〔薛文清〕

圣贤相传之道，尽性而已。〔薛文清〕

周子之几，超凡之梯；张子之豫，作圣之据；程朱之敬，立身之命。敬以立身，豫

以作圣，几以超凡。吾计始定。〔蔡虚斋〕

赵文肃公曰：少年不学隳复隳，壮年不学亏复亏，老年不学衰复衰。一息不学谓之忘，一时不学谓之狂，一日不学谓之荒。或问何谓学，曰：瞬有存，息有养，仁不可终食违，道不可须臾离，礼乐不可斯须去。〔脉望〕

观川流则思道体之无穷，视日阴则知天行之不息。〔南牖日笺〕

君子不能无非心之萌，而旋即去之，故日进于圣贤。小人不能无良心之萌，而旋自昧之，故日近于禽兽。〔赵梦白〕

此生不学一可惜，此日闲过二可惜，此身一败三可惜。〔黄正夫〕

量思宽，犯思忍，劳思先，功思让，坐思下，行思后，名思悔，位思卑，守思终，退思早。〔玉剑尊闻〕

天地有万古，此身难再得。人生只百年，此日最易过。幸生其间者，不可不知有生之乐，亦不可不怀虚生之忧。〔座右编〕

太极之秘义，一洙泗之微言。〔孙鍾元〕

读书不独变化气质，且能养人精神。盖义理收摄故也。〔拈屏语〕

孟子生而杨墨熄，程朱出而佛老衰。〔曹厚庵〕

为学全在精神，精神不足，未有能成者。精神者，二五之萃，人之本，德之舆也。爱养精神，完固其学，易明易成。〔研几录〕

修己

制水者必以堤防，制性者必以礼法。〔林和靖〕

为学大益，在自求变化气质。〔张横渠〕

阳明胜则德性用，阴浊胜则物欲行。〔张横渠〕

正心之始，当以己心为严师。〔张横渠〕

动以天为无妄。〔程伊川〕

蝉蜕人欲之私，春融天理之妙。〔张南轩〕

心本可静，事触则动。动之吉为君子，动之凶为小人。〔遵生笺〕

山势崇峻则草木不茂，水势湍急则鱼鳖不留。观山水可以观人矣。〔薛文清〕

气昏物诱者性之害，识明理胜者学之功。〔薛文清〕

知道则言自简。〔薛文清〕

慎言谨行，是修己第一事。〔薛文清〕

名节者，道之藩篱。藩篱不守，其中未有能独存者。〔陈白沙〕

不自重者取辱，不自畏者招祸，不自满者受益，不自是者博闻。〔景行录〕

人之精神，贵藏而用之。苟衒于外，鲜有不败者。〔邵子〕

象以牙而成擒，蚌以珠而见剖，翠以羽而招网，龟以壳而致亡，雉以尾而受羈，鸚以舌而取困，麝以脐而被获，犀以角而就烹，金铎以声自毁，膏烛以明自煎。故勇士死于锋镝，智士败于壅蔽，好水者溺于水，驰马者堕于马。君子慎勿以炫露而招损哉。〔什类书〕

寡言者可以杜忌，多行者可以藏拙，寡智者可以习静，寡能者可以节劳。〔省身集要〕

器虚则注之，满则覆之。木小则培之，大则伐之。故虚可处，满不可处也；小可处

，大不可处也。〔何大复〕

以简傲为高，以谄谀为礼，以刻薄为聪明，以鬩葺为宽大，胥失之矣。〔省身长语〕

养得胸中无一物，其大浩然无涯。有欲则邪得而入，无欲则邪无自而入。且无欲则所行自简，又觉胸中宽平快乐，静中有无限妙理。〔薛文清〕

造化翕聚专一则发育万物有力，人心凝静专一则穷理作事有力，愈收敛愈充扩，愈细密愈广大，愈深妙愈高明。〔薛文清〕

人须是一切世味淡薄方好，不要有富贵相。常自激昂，便不得堕坠。〔胡文定〕

凡人心，存于有警，而佚于无制。〔自警编〕

君子事来而心始见，事去而心随空。〔座右编〕

言行拟古人则德进，功名付天命则心闲。报应念子孙则事平，受享虑疾病则用俭。〔座右编〕

容耐是忍事第一法，安详是处事第一法，谦退是保身第一法，涵容是处人第一法，置富贵贫贱死生常变于度外是养心第一法。〔座右编〕

造命者天，立命者我。〔袁了凡〕

日日知非，日日改过。〔袁了凡〕

天下聪明俊秀不少，所以德不加修、业不加广者，只为因循二字担合一生。〔袁了凡〕

善所当为，羞谭福报。〔座右编〕

颜曾希圣，四勿三省。〔玉剑尊闻〕

尽人伦，体天理。〔朱勉斋〕

提出良心，自作主宰，决不令为邪欲所胜，方是工夫。〔金伯玉〕

血气盛则克治难，欲养心者先治其气。〔吴元汭先生〕

戒之为言，最为入道之首而进德之先。〔吴元汭〕

念头起处，纔觉向欲路上去，便挽从理路上来。一起便觉，一觉便转。〔菜根谈〕

节义傲青云，文章高白雪，若不以德性陶镕之，终为血气之私、技能之末。〔菜根谈〕

惇伦

父善教子者，教于孩提。君善责臣者，责于冗贱。盖嗜欲可以夺孝，富贵可以夺忠。〔林和靖〕

以爱妻子之心事亲，则无往而不孝。以保富贵之心事君，则无往而不忠。〔林和靖〕

以忠孝遗子孙者昌。〔林和靖〕

尝思君臣父子夫妇兄弟朋友，有多少不尽分处。〔程明道〕

为家以正伦理、别内外为本，尊祖睦族为先，以勉学修身为要，树艺牧畜为常。守以节俭，行以慈让，足己而济人，习礼而畏法，可以寡过，可以静摄，可以成德。〔遵生笺〕

孝友德行第一事，故曰行仁之本。张仲以孝友人佐天子，君陈以孝友出尹东都，大舜以孝友为天子。〔郑淡泉〕

凡为子孙计者，当戒以忿怒致争。忿怒致争，其初甚微，其祸甚大。语曰：一朝之忿，忘其身以及其亲。此之谓也。性犹火也，方发之初，灭之甚易。既炎则焚山燎原，不可扑灭。若人屡相凌逼，当理遣之、逊避之。〔王氏家训〕

狄梁公以一身系唐宗社之重，贤者识其心，自白云一念中来。故曰求忠臣于孝子之门。〔陈白沙〕

易基乾坤，诗始关雎。夫妇之际，人道莫重焉。周太王、王季、文王、武王，有太姜、太妊、太姒、邑姜为配。周之子孙独盛于夏商，世祚亦最永。岂惟帝王，古今世家，亦多繇母德之贤。故婚配不可不慎。〔集语要〕

常观孝弟之风，多敦于贫贱之族，而衰于富贵之家。盖贫贱之族，骨肉相爱之情真也。富贵之家，势利争夺之私胜也。〔东谷赘言〕

闻君子议论，如啜苦茗，森严之后甘芳溢颊。闻小人谄笑，如嚼糖冰，爽美之后寒沍凝腹。〔樵谈〕

家人有过，不宜暴扬，不宜轻弃。此事难言，借他事隐讽之；今日不悟，俟来日正警之。如春风解冻，如和气消寒，纔是家庭的型范。〔菜根谈〕

政术

亲履艰难者知下情，备经险易者达物伪。〔张衡〕

用不节财何以丰，民不苏国何以安。〔林和靖〕

邪正者治乱之本，赏罚者治乱之具。举正错邪，赏善罚恶，未有不治者。邪正相杂，赏罚不当，求治难矣。〔林和靖〕

论学便要明理，论治便须识体。〔程明道〕

有天德便可语王道，其要只在慎独。〔程明道〕

治天下以正风俗、得贤才为本。〔程明道〕

必有关雎麟趾之意，然后可以行周官之法度。〔程明道〕

欲当大事，须是笃实。〔程明道〕

学者不可不通世务。〔程伊川〕

风俗天下之大事，廉耻士人之美节，为政者当以扶纲常、正名分、重道义为第一。
〔司马温公〕

放亿万之羽毛，未若消兵以全赤子；饭无数之缁褐，不如散廩以活饥民。周宣歌泽雁，孟子讽野殍，言穷民之当恤也。〔苏东坡〕

夫宰相者，持心如水，以义理为权衡而已，无与。〔刘伯温〕

处有事当如无事，处大事当如小事。〔夏忠靖〕

言忠信、行笃敬，天德也。不伤财、不害民，王道也。〔梁石门〕

三纲五常，礼乐之本，万世之原。〔薛文清〕

自古有天下者，观其所用之人，则政事可知矣。〔薛文清〕

为政以爱人为本。〔薛文清〕

圣人治天下，公而已。〔薛文清〕

法者，礼乐刑政是也。〔薛文清〕

天人一理，故致乖致和，无不感通。〔薛文清〕

举四海九州岛生民之气既和，则自足以感阴阳之和。举四海九州岛生民之气既乖，则亦足以感阴阳之异。此理之必然也。〔薛文清〕

禹贡纪山川而不纪风俗，纪物产而不纪人才。风俗人才，由乎上之教化也。〔升庵璚语〕

平准书讥横敛之臣，货殖传讥好贷之君，太史公之旨懿哉。〔升庵璚语〕

中才皆可用之才，不必求备。平易有近民之实，不必务奇。治有端绪，不必责效于旦夕之间。事可包荒，不必刻意于渊鱼之察。〔石文介〕

席地古礼也，今也严。肉刑古政也，今也仁。〔弇州割记〕

图治之道察于事，则愈察而愈细。研于理，则愈研而愈精。〔文文起〕

国家之用才，犹农家之积粟。粟积于丰年，乃可以济饥。才储于平时，乃可以济事。〔玉剑尊闻〕

风俗奢侈，所关不小。如古今阶乱者，在太平富庶之后。其反治者，乃于国乱民贫得之。〔憬然录〕

兵贵精不贵多，兵不用命，上无节制故也。〔毛伯温〕

为国欲致升平，必厚风俗。欲厚风俗，必正士习。欲正士习，必重师儒。此成周来已试之效也。〔藤阴箭记〕

教化衰则风俗日坏，敛财急则民生日困。〔集语要〕

成周六善，以廉为首。当官三事，厥重惟清。〔谷贻录〕

阴小人也，阳君子也。进君子而退小人，燮理之能事毕矣。〔魏环极庸言〕

敬畏

恐惧者修身之本。事前而恐惧则畏，畏可以免祸；事后而恐惧则悔，悔可以改过。夫知者以畏消悔，愚者无所畏而不知悔，故知者保身，愚者杀身。大哉，所谓恐惧也。〔林和靖〕

坐密室如通衢，驭寸心如六马，可以免过。〔林和靖〕

敬胜百邪。〔程明道〕

敬只是主一也。〔程伊川〕

学者当提醒此心，如日之升，群邪自息。〔朱文公〕

心存焉则谓之敬。〔吕东莱〕

善保家者戒兴讼，善保国者戒用兵。讼不可长，讼长虽富家必敝。兵不可久，兵久虽大国必诎。〔胡文定〕

罗竹谷着畏说，曰：天子且有所畏，诗曰我其夙夜畏天之威。孰谓士大夫而可不知所畏乎，圣人且有所畏，鲁论曰畏天命畏大人畏圣人之言。孰谓学者而可不知所畏乎，苟内不畏父兄之言，外不畏师友之议，仰不畏天，俯不畏人，猖狂妄行，恣其所欲，吾惧其入于小人之归也。〔鹤林玉露〕

君子之立身立言，不可不慎。称杨伯起者，以其辞暮夜之金也。薄杨子云者，以其献美新之文也。〔东谷赘言〕

欲为君子，非积行累善，莫之能致。一念私邪，立见为小人。故曰：终身为善不足，一日为恶有余。〔宾退录〕

圣贤成大事者，皆从战战兢兢之心来。〔薛文清〕

万事敬则吉，怠则凶。〔薛文清〕

易摇而难定、易昏而难明者，人心也。惟主敬则定而明。〔薛文清〕

在暗室屋漏中，常恐得罪天地鬼神。〔袁了凡〕

知天地神人顷刻不离，自然常存敬畏。知祖孙父子荣辱相关，自然爱惜身名。〔赵

梦白择言]

勤俭

一年之计在于春，一日之计在于寅。〔座右编〕

民生在勤，勤则不匮。一夫不耕，必受其饥；一妇不蚕，必受其寒。是勤可免饥寒也。农民昼则力作，夜则颓然甘寝，非心淫念无从而生，是勤可远患也。户枢不蠹，流水不腐，周公论三宗文王之寿，必归之无逸。是勤可致寿考也。故大禹必惜寸阴。〔鹤林玉露〕

俭于听可以养虚，俭于视可以养神，俭于言可以养气，俭于门閤可无盗贼，俭于嫖娼可保寿命，俭于心可出生死。是知俭为万化之柄。〔谭子〕

有保一器毕生不匮者，有挂一裘十年不敝者，斯人也，可以司粟帛，可以亲百姓，可以掌符玺，可以即清静之道。〔谭子〕

生财不如节财，省用方能足用。〔王十朋理财策〕

不厚费者不多营，不妄用者不过取。〔谷贻录〕

走江湖不如乐田园，炼丹砂不如惜五谷，结权贵不如乐妻孥，奉仙佛不如歆祖考。〔黎寿〕

摄生

水之有源，其流必远。木之有根，其叶必茂。屋之有基，其柱必正。人之有精，其命必长。〔抱朴子〕

多言则背道，多欲则伤生。〔林和靖〕

声色者，败德之具。〔林和靖〕

寡言省谤，寡欲保身。〔林和靖〕

广积聚者，遗子孙以祸害。多声色者，残性命以斧斤。〔林和靖〕

口腹不节，致疾之因。念虑不正，杀身之本。〔林和靖〕

吾尝夏葛而冬裘、饥食而渴饮，节嗜欲，定心气，如斯而已矣。〔程明道〕

天下同知畏有形之寇，而不知畏无形之寇。欲之寇人，甚于兵革；礼之卫人，甚于城郭。〔吕东莱〕

精神不运则愚，气血不运则病。〔陆象山〕

治身养性者，节寝处，适饮食，和喜怒，便动静。在已者得而邪气无由入。〔辛文子〕

万般补养皆虚伪，惟有操心是要规。〔许鲁斋〕

人之将疾也，必先酒色之好。国之将亡也，必恶直谏之言。〔辛文子〕

耳目淫于声色，五脏动摇而不动，血气逸荡而不休，精神驰骋而不守，祸之来如邱山，无由识之矣。〔辛文子〕

持守正念之法，如执玉，如捧盈，战战兢兢，惟恐失坠。〔脉望〕

人身未尝有疾也，疾之生，必有致之之由。诚能预谨于饮食嗜欲之际，而慎察于喜怒哀乐之间，以固其元气，而调其荣卫，使寒暑燥湿之毒不能奸其中，虽微药石，固不害其为寿。〔方逊志〕

形劳而不休则蔽，精用而不已则竭。〔庄子〕

摄生之道，大忌嗔怒。〔百警世编〕

勿以妄想戕真心，勿以客气伤元气。〔康斋日记〕

衰病多事，如着敝絮入荆棘中，触处挂阂。简豫习静，如排沙寻金，往往见宝。〔集语要〕

常沈静则含蓄，义理深而应事有力，故厚重静定宽缓，乃进德之基，亦养寿之要。〔薛文清〕

只寡欲便无事，无事心便澄然矣。〔薛文清〕

迷于利欲者如醉酒之人，人不堪其丑，而已不觉也。〔薛文清〕

生死路窄，只在寡欲与否。〔吴忠节公〕

绝饮酒，薄滋味，则气自清。寡思虑，屏嗜欲，则精自明。定心气，少眠睡，则神自澄。〔王阳明〕

夫天有元气焉，善养生者养此而已矣。善固国者，固此而已矣。元气者何？仁也。〔藤阴笥记〕

安静可以养福。〔座右编〕

人常想病时则尘心自灭，人常想死时则道念自生。风流得意之事一过，辄生悲凉；清真寂寞之境愈久，转有滋味。〔崇修指要〕

人之精神有限，过用则竭。〔座右编〕

欲心一萌，当思礼义以胜之。〔座右编〕

地上有门曰祸门，而作恶者自投之。地下有门曰鬼门，而好色者自趋之。此二门者，皆一入而不出者也。〔座右编〕

服金石酷烈之药，必致损命。即坐功服气，往往损人。人能清心寡欲，自然血气和平，却疾多寿。〔申凫盟荆园小语〕

福者备也，备者百顺之名也。人惟起居饮食日顺其常，福莫大焉。〔乐善录〕

接物

飞鸟以山为卑，而层巢其巔。鱼鳖以渊为浅，而穿穴其中。然所以得之者，饵也。君子苟能无以利害身，则辱安从生乎。〔曾子〕

处事速不如思，便不如当，用意不如平心。〔张无垢〕

人之于患难，只有一个处置：尽人谋之后，却须泰然处之。〔程伊川〕

凡为人言者，理胜则事明，气忿则招拂。〔程明道〕

惟正足以服人。〔薛文清〕

深以刻薄为戒，每事当存忠厚。〔薛文清〕

事来不问小大，即当揆之以义。〔薛文清〕

但当循理，不可使气。〔薛文清〕

木秀于林，风必摧之。堆出于岸，流必湍之。行高于人，众必非之。所以良田每败于邪径，黄金多铄于众口。投杼且疑于三疑，市虎亦成于三人。青蝇簧鼓，无世无之。是以君子贵先觉也。〔谷贻录〕

泛交不如寡交，多求不如慎守。〔遵生笺〕

虑事周密，处心泰然。〔南牖日笺〕

罪莫大于淫，祸莫大于贪，咎莫大于僭。此三者祸之车。〔南牖日笺〕

石生玉，反相剥。木生虫，还自食。人生事，还自贼。好事者未尝不败，争利者未尝不穷。〔辛文子〕

万物不能碍天之大，万事不能碍心之虚。〔南牖日笺〕

道心只在人心，应感上磨练；天理只在人事，变态中体贴。〔南牖日笺〕

说人之短，乃护己之短。夸己之长，乃忌人之长。皆由存心不厚、识量太狭耳。能去此弊，可以进德，可以远怨。〔省身集要〕

君子不迫人于险。当人危急之时，操纵在我，宽一分则彼受一分之惠。若阨之不已，乌穷则攫，兽穷则搏，反噬之祸，将不可救。〔脉望〕

觉人之诈，不形于言。受人之侮，不动于色。此中有无穷意味。〔拈屏语〕

市私恩不如挟公议，结新知不如敦旧好，立荣名不如种隐德，尚奇节不如谨庸言。〔菜根谈〕

君子不以己之长露人之短。天地间长短不齐，物之情也。必欲炫己之长露人之短，跬步成讎矣。言人之短者，谓种祸。〔笔畴〕

出处

圣人不畏多难，而畏无难。〔容斋随笔〕

讲学论政，当切切询人。若夫去就语默，如人饮食寒温，必自斟酌，不可询人，亦非人所能决也。〔胡安国〕

与其得罪于百姓，不如得罪于上官。〔吴其〕

与其进而负于君，不若退而合于道。〔李衡〕

圣贤处世，出有出的道理，处有处的道理。尽得道理，出也好，处也好。今人志于富贵功名，所以见的处不如出也。〔座右编〕

乱世之名，以少取为贵。〔座右编〕

自古豪杰之士，立业建功、定变弭难，以无所为而为者为高。若范蠡霸越而扁舟五湖，鲁仲连下聊城而辞千金之谢、却帝秦而逃上爵之封，张子房颠羸蹶项而飘然从赤松子游，皆高出秦汉人物之上。〔鹤林玉露〕

进将有为，退必自修。君子出处，惟此二事。〔薛文清〕

修德行义之外，当一听于天。若计较利达日夜，思虑万端，而所思虑者又未必遂，徒自劳扰，祇见其不知命也。〔薛文清〕

德业常看胜我者，则愧耻自增。爵禄常看不及我者，则怨尤自息。〔人伦要鉴〕

仕宦居乡，百凡炫耀，所谓众皆悦之，其为士者笑之也。〔文雅社约〕

人品

外重者内轻，故保富贵而丧名节。内重者外轻，故守道德而乐贫贱。〔林和靖〕

忠信廉洁，立身之本，非钓名之具也。〔林和靖〕

君子所贵，世俗所羞。世俗所贵，君子所贱。〔程伊川〕

宁可忍饿而死，不可苟利而生。〔宋潜溪〕

取与是一大节，其义不可不明。〔薛文清〕

名节至大，不可妄交非类。〔薛文清〕

愿为真士夫，不愿为假道学。〔邵文庄〕

视屋漏如明廷，对妻孥如大宾。〔玉剑尊闻〕

财散可来，名辱不复。〔玉剑尊闻〕

居乡勿为乡愿，居官勿为鄙夫。〔高子遗书〕

名节之于人，不金帛而富，不轩冕而贵。士无名节，犹女不贞，虽有他美，亦不足赎。故前辈谓爵禄易得、名节难保。〔官箴集要〕

不学之谓贫，无成之谓贱，心死之谓夭，失身之谓无后。〔弇州劄记〕

为人如构室，先须根基坚固，始可承载。忠诚敦厚，人之根基也。〔宁鸿子〕

只这主张形骸的一点良心，常然静定，便是超凡入圣。〔集语要〕

见人有得意事，便当生忻喜心。见人有失意事，便当生怜悯心。皆自己真实受用处。忌成乐欺，何预人事？自坏心术耳。〔座右编〕

诗书乃圣人之供案，妻妾乃屋漏之史官。〔座右编〕

世人若不求利即无害，若不求福即无祸。〔座右编〕

人能不以衣食自累，而读书厚自堤防，则置身洁白，而与圣贤同归矣。〔座右编〕